



黄坪川寿藏记

镇南坪川黄君，卜地于州西北隅十五里许，以为宅兆。其地自壬亥出，蜿蜒而来，甲坐庚向。前有朱雀之盘郁，后有玄武之镇静，以青龙则昂然峙其左，以白虎则蹲然伏其右，且列屏列幃，带褥带衲，奇哉！亦堪輿之大观也。黄君乃于此地豫筑寿藏，其冢子庠生黄嘉祚请记于余，以镌诸石。余曰，天地一蓬庐也，古今一瞬息也，死生一夜旦也，吾当博观阴阳之化，以瞰动静之机，常见自春而冬，莠者未始不寂，荣者未始不枯，泽者未始不悴。矧吾人生则寄，死则归，即无论王公大人，田夫野叟，孰不归此长夜室乎。第百岁后，置诸安则后亦安，置诸危则后亦危，此理也。黄君独超时见，治此生基，宁独为一己百年安身计哉？而所以贻后世子孙无穷之安者，端在此也。所以然者，良由黄君蚤岁学易，习举子业，继而以家君命，隐居不仕，乐守田园，始锐志青囊，而于龙穴砂水，悉察其占窍，故得桂月首善之地而茔焉。厥初葬其祖黄奇环，又葬其妣邹氏善缘，以致家道日益兴隆，后嗣日益繁衍，润屋宇，广阡陌，虽以陶朱猗顿，亦不少让，兹非卜宅兆之明效大验乎。而黄君缔造之功不可少也。不特此也，黄君之为，秉心直亮，赋性倜傥，素与士大夫交游，每莅任，即公无不以礼优遇。有克勤克俭之风，有宜室宜家之德，以奉先则建祠堂，置祭田，其孝思可嘉也；以教家，则创书馆，训儿曹，其义方可尚也；以厚族，则殡诸叔，抚

昆弟，其敦睦可称也。至于输产以迁学宫，捐资以修岳祠，备谷以充义仓，何者，非慨慷尚义之举乎？故州主太守黄公奖之曰：“世敦高义”。府主别驾王公奖之曰：“积庆流芳”。则黄君之生平雅致可概睹矣。黄君讳熙，别号坪川，江西吉安府安福县五十一都寻思塘人也。其祖惟济公，以良贾始游于滇，惟济公生奇环，奇环生寿官、廷佐，遂卜居镇南，为平夷乡编户。廷佐沐隆庆恩典，授以冠裳，为人忠厚善良，累与乡饮。廷佐生熙，熙生嘉祚、嘉祐、嘉裕、嘉祉，皆入黉宫，嘉祚先食禀禄登辛卯亚魁。夫以黄君虽不仕而有厥子，若孙彬彬辈出，其待诰封，即有可卜者哉。君如坚其为善之心，植善根，种善果，则不但寿弥永，福弥昌，而令德可垂之不朽矣。余不佞，遂为之记，俾后世知有所自云。时万历辛卯二月二十四日。

孙黄逢泰、逢亨、逢乡、交泰、开泰 逢春
楚雄府镇南州儒学训导呈贡三台山人月洲刘世盛撰

该墓位于南华县六盘山黄氏祖莹，大理石碑，高92厘米，宽52厘米。楷书直行，刘世盛撰书，明万历辛卯（1591年）立。

镇南平彝乡黄氏祖考

黄氏祖籍江西省吉安府安福县五十一都寻思塘村
始祖黄惟济约明正德年间（1506—1520年）经商到云南。
→二世黄廷佑定居镇南平彝乡。→三世黄肇熙号坪川→

四世黄	嘉祚	——	五世黄	逢泰	——	六世黄	天宠
	嘉祉			逢亨			天眷
	嘉裕						天赐
	嘉礼						
	嘉祐						

七世黄应龙
应宿
应凤
应麟